



*Kamis, 23 Mei 2024*  
**Ogen: Johanes 19:25-27**



*"Ngarak-ngarak Jesus ku Salib"*



**E**nterem diberu-diberu ngikutken Jesus tupung IA isalibken. Maria Magdalena, Maria ndehara Kleopas, nandeNa bage pe senina nande Jesus, janah melala denga diberu-diberu sideban si la tersurat gelarna i bas Pustaka Si Badia si ngarakken Jesus tupung ia isalibken. Diberu-diberu radu ras ajar-ajarNa tetap ngikutken Jesus seh IA i salibken aminna kai si idahikenna e mbelin kal resiko si aloken diberu-diberu radu ras ajar-ajar Jesus. Resiko e la ngolangi diberu-diberu bage pe ajar-ajar guna tetap ngikutken Ia seh ku ingan i ja Jesus isalibken.

Johanes 19:25-27 naksiken maka deherken kayu persilang Jesus tedis nandeNa bage pe ajar-ajarNa. Jesus mperjelas status nande bage pe ajar-ajarNa alu ngataken man nandeNa maka ajar-ajar e jadi anakna janah nande Jesus jadi nande ajar-ajar si tedis deher salib Jesus. Status si ikataken Jesus e nuduhkan maka aminna IA ngenanami kiniseran tapi keleng ateNa e tetap ituduhkanNa man nande bage pe man ajar-ajarNa; status si ikataken Jesus erbahansa hubungan ajar-ajar ras nandeNa reh deherna, hal enda icidahken kenca ngerana Jesus kerna status e, maka nande Jesus tading ras ajar-ajar i rumah aja-ajar e.

Ngarak-ngarak Jesus ku salib e me si jadi tema paksa tenengta wari enda. Arah kata ngarak-ngarak enda encidahken maka tentuna memerlukan waktu ras gegeh erkiteken jarak si itempuh kalak enda labo ndeher. Ngarak-ngarak Jesus ku salib memerlukan mental si megegeh erkiteken enterem jelma si ngikutken IA. Ngarak-ngarak Jesus ku salib iperlukan gegeh erkiteken kondisi dalam labo ngincuah saja tapi pe nangkeng-nangkeng ras erbatu-batu. Si enda la jadi penghalang man diberu-diberu rikut ras ajar-ajarNa guna ngikutken Jesus jenari tedis deherken salibNa.

Situasi ras kondisi si la bagi ukur e me salibta paksa gundari enda, banci jadi situasinta erbahanca kita kote bagi dalam ngincuah-nangkeng ras erbatu-batu; tapi tetaplah kita tedis i bas kiniteken.